

O LE SULU SAMOA



EKALESIA FAAPOTOPOTOGA KERISIANO SAMOA
O LENU SIPEPA FAA-LE-LOTU NA FAAVAEINA I LE T.A. 1839



FAAVAEINA 1839 O LE SULU SAMOA IUNI 2025

email: sulusamoa@cccs.org.ws - Main Office: Ph.24414, Ext 29 - website: www.cccs.org.ws

OSIGA FEAGAIGA EFKS
HUTT VALLEY, PULEGA
UELIGITONE I SAUTE,
MATAGALUEGA LAUMUA O
AOTEAROA - NIU SILA



**SUSUGA KEREVETA
TIUMALU (FS) MA LE
FALETUA IA FAANAITAU**

OSIGA FEAGAIGA EFKS
ROCKBANK, PULEGA
MELEPONE MATU,
MATAGALUEGA VITORIA -
AUSETALIA



**SUSUGA SATALA SA'U (FS) MA
LE FALETUA IA SAPI**

O LE FAASINO UPU

- | | |
|-------------------------------------|----|
| 1. LAUGA | 2 |
| 2. 150 FONOTELE MALUA | 3 |
| 3. FEAU O LE ASO- MASINA IUNI | 6 |
| 4. O LE PERIFETA MULIMULI | 11 |
| 5. OSIGAFEAGAIGA EFKS HUTT VALLEY | 12 |
| OSIGAFEAGAIGA EFKS ROCKBANK | 13 |
| 6. FEILOAIGA A LE LAULAU FONOTELE | 14 |
| MA LE OFISA TUTOTONU AMATA | |
| AI GALUEGA O LE IUNI 2025 - ME 2026 | |
| 7. O E UA MALILIU | 15 |

LAUGA

Tusi Faitau: Feagaiga Tuai: Faataoto 16:7-10

Matua: Faataoto 16:9 “E filifili i le loto o le tagata lona ala, a o le Alii na te faatonuina le mea e ui ai o ia.”

Manatu Autu: **E FILIFILI SAOLOTO LOU ALA, AE FAATO A TONU I LE TAITAIGA A LE AGAGA PAIA. / YOU'RE FREE TO CHOOSE YOUR WAY, BUT JUSTIFYING IT IS BY THE GUIDANCE OF THE HOLY SPIRIT.**

E ui a o le aiā tatou ua tuuina mai e le manatu autu ia te oe ma au, ma tatou uma, tatou te filifili saoloto ai i se ala tatou te ui ai, ae a mātau lelei i ai, e i ai ona i'u.

Foliga mai e togi le moa, ae u'u le manoa. E i ai le vaivaiga, a'e mafai ona ou faapea atu, e tautua'ase'e le autu. E i ai tua o pata tua, nei mea ane, ua o tatou se'etia ai i le malū o le tai taeao, ona la'avale lea o la tatou malaga fa'aauau.

O le uiga lena o upu ia e fai ma matua; “E filifili i le loto o le tagata lona ala, a'o le Alii, na te faatonuina le mea e ui ai o ia.”

Afai o le tagata o le palealii o galuega mamana, a'o le faatusa paia o le Atua. O lona uiga, e leai se avanoa, e leai se alofaga, tatou te lē lalafi ā i le ataata o le laau. E lē faia i ai so tatou loto.

O lona uiga, e filifili saoloto le tagata, ae lē o se saolotoga e so'ona tafili saunoa ai. E lagona le faatauva'a ae faamoemoe mea uma i le taitaiga mana a le Atua, ona tonu lea ma sa'o le ala e ui ai. O fea e ui ai? E ui i ala o le Atua.

O le ala lena o loo faamapu'e ai e le poto le silisiliese o le Atua. O le tagata e tapena, a'o le Atua e faasino ma faatonu mai le ala e ui ma savali ai.

E i ai le talitonuga e faapea, o tusi nei a le atamai, o le tusi na tusia e le tupu o Solomona, ina ua avea o ia ma tagata matua, ua sinasina lana tofā o le talalelei, ua tauagaga ifo le la o lona soifua. Ua tu ma toe tepa i tua i lona olaga atoa. Taimi o le talavou ma le malosi. Taimi o le osaosa o le tamaoaga ma le olaga so'ona fai.

Ua tō manatu i le tuana'i, ona faapeaane lea; “E matuā fa'atauva'a, e matuā fa'atauva'a; e fa'atauva'a mea uma lava.” O le mata'u i le Alii, o le amataga lea o le poto.

Afai e taumafai e tau'i faatasi lagona ia o le poto, ona faapea lea; E leai a se uiga o le olaga pe a aunoa le tagata ma le Atua. O le vaai lea a le Poto, ua se taimata uiga ma amioga a le tagata. O le mana'otele ma le amio ua lē tonu, ua faatuputeleina ai le agasala. O le upu moni, e ita mai le lalolagi, a'o le ola e mata'u ma fiasia i le Alii, o inā e atagia ai le filifiliga matagofie faa-le-Atua. O le ola e lē uigā pe a aunoa le tagata ma le Atua, ona tuufesili lea o le poto; O le a la le uiga e ola ai? O le a le uiga e savali ai ae e lē o fiasia i ai le Alii i le ala o lo'o ui ai?

Ioe, e i ai lava le ma'atui ma le ma'agao i le ala, ae aua foi nei fai ma alofaga fitā o le ala. Po'o fea lava e aga'i i ai, ia mautinoa, o la e savali, ae fiasia i ai le Alii. Ae a fiasia i ai le Alii ona a lea? O le uiga lena o upu a le poto o loo i le faaiuga o le fuaiupu e fitu. “Ona faatupuina lea e ia o le leleiga ma ia o e ita ia te ia.” O tua lelei na, o 'ai na o le tagata e sa'o ma tonu lana savali. E savali a'o la e fiasia i ai le Alii i ona ala. E fai e le Atua le leleiga.

O le upu leleiga, o lo'o faaliliuina mai i le upu faaperetania, *peace with them*.

A toe talatala le matālalaga lea ona faapea lea, o lea lava o loo faamapu'e e le poto le tagata e fiafia le Alii i le ala e ui ai. E lē gāoia, e to'amalie auā e aumai e le Alii le filemu i lona loto e fai ma so'otaga, e pae ai le va nonofo.

Ua tu'ualalo le poto i lagona, ua tu'ualalo le poto i le amio, o uiga faaalua, o le mana'o tele e fete'ena'i ai le ola o le tagata ma le lalolagi. Ia talitonu, faamoemoe ma faatuatua le filifiliga saoloto a le tagata i le Atua. E tolu nai upu matagofie o loo tāooto faalieloga i totonu o le tusiga ua ou manatu, o lo'o tāui ai le 'anofale, a'o lagona momoli ia o le poto.

Muamua, o le upu fiafia, lua o le upu leleiga o lo'o i le fuaiupu e fitu, ma le upu amiotonu, o lo'o i le fuaiupu e valu. O le fiafia, o le leleiga ma le amiotonu, o uiga matagofie ia faa-le-Atua. "O upu ia, a lē iite poto, o uiga faaalua ia e laei ai laugutu o le tupu, e lē tautala faapiopio lona fofoga i le faamasinoga." Responsibility of a leader.

O tiute ia faataitai, lea o loo taualuga ai le faitauga. O le valaau lea a le poto mo tatou o taitai pe a fai a tatou filifiliga saoloto. Tatou te filifili saoloto ae faamoemoe i le taitaiga mana a le Atua. O lona uiga, tatou te filifili faa-le-Atua. O le filifili faa-le-Atua e faamaoni, e fiafia, na te faia le leleiga, e faatupu le filemu, e tautala ma le amiotonu.

O le feau lea o le talalelei ao tatou i ai i le malaga faaauau o lenei tausaga. O lea ua se'e lo tatou sa folau i le tai, feau faaauau o lenei tausaga. O le tuualalo a le talalelei, e pule a oe ma a'u i la tatou filifiliga. Tatou te filifili saoloto, ae aua lava nei o tatou seetia ai i le malū o le tai taeao. O oe ma au o tatou o tagata savavali, tatou o le a'u malaga a le Atua i le ala. O lo tatou tiute lea; E FILIFILI SAOLOTO LOU ALA, AE FAATO A TONU I LE TAITAIGA A LE AGAGA PAIA. E faaosoosoina i tatou, e fetosoaina i tatou, e amusia i tatou, e faavaivaia i tatou. E sasi ai loa la tatou filifiliga, taitai loa tatou e le lalolagi. E taitai tatou e le lalolagi tatou leiloloa loa i le pouliuli. O le augani a le talalelei, ia e poto e te savali, ia e poto e te malaga, ia e poto e te leiloa. O le leiloa poto, o le leiloa e toe aga'i e saili le ala o le Atua. O ala o le

Atua o le mata'u i le Atua, lagonaina o le faatauva. O ala o le Atua o le alofa, filemu, faapalepale, onosa'i, fefaamagaloa'i ma isi uiga matagofie faa-le-Atua. O ala na e finagalo le Atua tatou te ui ai. Manatua, e faatoa tonu a o tatou ala, pe a taitai lou soifua, oe ma a'u e le Agaga o le Atua, ona leai lea o se alualu a i luma, toe solomuli tēisi i tua, pe alualu a leiloa i le ala. Ae afai foi e sasi lau filifiliga ma lē tonu la tatou savaliga, afai foi tatou te mafatia i le ala, la e faatali mai le agaga o le Atua e tonu ai le savaliga.

O le ola e uigā i le Atua, o le ola e mata'u ma lagonaina le faatauva, ae faamoemoe i le taitaiga a le Agaga Paia. Po o fea lava e aga i ai le filifiliga saoloto i le ala e ui ai, e savali a ua mautinoa o la e puipui e le Atua, e savali a ua faamanuia i ai le Atua. Na filifili a Iesu Keriso i le satauro ma le tuugamau, na faamoemoe lava i le mana o le Agaga o le Atua, lea ua maua ai lo tatou taeao fou, ma ua ola fiafia oe ma a'u, e faavavau, faavavau lava. "E filifili i le loto o le tagata lona ala, a o le Alii na te faatonuina le mea e ui ai o ia." Ia manatua, e filifili saoloto lou ala, ae faatoa tonu i le taitaiga a le Agaga Paia. Ona o Iesu,...Amene.

Saunia: Onosai So'o (FS)

EFKS Saoluafata

Matagaluega APIA I SASA'E

TALA FAASOLOPITO 150 **FONO TELE** **(Sosoo mai le Sulu Samoa Me** **2025)**

O le Komiti Feau Eseese e i ai totonu le Komiti Faafuasei a le Komiti Feau Eseese, faatasi ai ma le Komiti o Galuega; Komiti o Tusi ma Mea Lomia ma le Fale Lomitusi; le Komiti o Ioane Viliamu; ma le Komiti o Fanua ma Fale. O le Komiti o Atina'e. O le Komiti o A'oga e i ai i totonu le Komiti Faafuase'i a le Komiti A'oga. O le Komiti o Tupe, e i ai totonu le Komiti Faafuase'i a le Komiti Tupe. E aofia ai i le saofaiga o sui usufono o le Fono

Tele, sui filifilia mai i Aulotu, Pulega, Matagaluega, Tupulaga Talavou, Kolisi Faafaifeau i Malua, ma le Mafutaga Tina.

**O Nisi o Suafa o Tamā Samoa (Faifeau
ma Tiakono) na tula'i mai le Tofi
Ta'ita'ifono o le Fono Tele i totonu o le
150 tausaga.**

E manatua pea le sao tāua o nai Tamā, o e sa fitaituga e le gata o le ta'ita'iina o Fono Tele, a o i latou sa i le Laulau o le Fono Tele mai lava i le amataga. E ui ina ua fai i lagi le folauga, a e manatua ma ola pea galuega lelei, na o latou faia mo le Atua e ala i lana Ekalesia. Ua faailoa atu ai i lalo nisi o suafa ua mafai ona maua, o le mamalu o Tamā Samoa, sa avea ma Ta'ita'ifono o le Fono Tele a le Ekalesia. O le a fa'aatoatoa le lisi lenei, i le agiga i luma o le tuufaatasiga o lenei tala faasolopito taua tele o le Ekalesia.

Vaelua Petaia (FS), Alama (FS), Esene (FS), Manu (FT), Alesana (FT), Etene Saaga (FT), Elisara (FT), Tupe Safa'i Tupe (FT), Siō (FT), Mose (FT), Tapeni Ioelu (FT), Mila Sapolu (FT), Poasa Te'o (FT), R. Sotoa (FT), Mataafa Faumuina (TK), Luamanuvae Eti (TK), A.U. Fuimaono (TK), Vavae Toma (FS), Tu'uau Sao (FT), Tofilau Eti Alesana (TK), Tulafono Faagau (FT), Faamatala Aseta (FT), Fuata'i Tuāutu (FT), Oka Fauolo (FT), Utufua Naseri (FT), Mareko Mareko (FT), Sulufaiga Samasoni (FT), Si'ueva Gogo (FT), Esekielu (Situfu)Tanielu (FT), Atapana Alama (FT), Tavita Roma (FT), Lale Ieremia (FT), Tautiaga Senara (FT), Tunumoso Soliola Iosia (FT), Tautiaga Senara (FT), Tunumoso Soliola Iosia (FT), Iosefa Uilelea (FT), Esera Auatama Esera (FS).

**O le Fono Tele ma le Kolisi Faafaifeau i
Malua**

Mai le tuufaatasiga o lenei oototoga o le tala faasolopito o le 150 tausaga o le Fono Tele, na iloa ai, e i ai le fesootaiga vavalalata o le Fono Tele ma le Kolisi Faafaifeau i Malua. I le ta'ita'iga a le Laulau a le Fono Tele, o le faatofalaiga a sui usufono o Komiti eseese, o Aulotu, o Pulega, ma Matagaluega

i Samoa nei ma atunuu i fafo, e fai ma sui o le Ekalesia Aoao, e talanoaina atina'e e lelei ma manuia auā le lumanai o le Ekalesia. O se tasi o faataitaiga o le tofa mamao ma le tofa liuliu a le Fono Tele, ia faatumauina le alualu i luma o polokalame a'oa'oina, e faamaite e le Kolisi Faafaifeau, ma le Kolisi o Malua, a e talisapaia faatuaoelele e le finagalo o le Fono Tele. O le tali mai a le Fono Tele, o le fa'auauina lea e Malua ma le Ekalesia Aoao, o se miti a misionare ma le Ekalesia na i ai i le amatagaina ua amata lana Kolisi Faafaifeau i Malua i le tausaga 1844. 'Ia avea Malua e fai ma A'oga Faafaifeau, e lelei lona tulaga tau a'oa'oga auā le faamoemoe o le a'oa'oina lelei ai o Faifeau mo le Talalelei o le lumanai.' E leai se mea e mafai e Malua ma le taumafai malosi o nai Tama Faatonu o le Komiti o Malua, ma le Saofaiga a Tama o le Ekalesia, pe ana le tusa ai ma le lagolago a le Ekalesia Aoao, e ala i lana Fono Tele. Le tofa mamao ma le tofa liuliu lea a le Fono Tele, o lea ua see malie ai pea le vaa o Malua, i le a'oa'oina ai o polokalame nei ma faailoga e maua ai: 'Diploma of Theology; Bachelor of Theology; Bachelor of Divinity with Honors; Master of Theology.' Ua taoto foi i le tautiaga o polokalame a'oa'oina i Malua, le faia o le Doctor of Philosophy (PhD), e amataina i le tausaga fou, 2026.

O le isi faamaoniga o le taua tele o le Fono Tele mo le atina'eina o le Ekalesia e ala i lana Kolisi Faafaifeau, o le taliaina e le Fono Tele i le tausaga 2024 o le mau a le Komiti a Toeaina, mo le fausiaina o se Faletusi fou o le Kolisi Faafaifeau i Malua ma le Ekalesia. Ua molimauina i le gasologa i le taimi nei, o lea galuega tele, e pei ona avea ai maa faamanatu o le 150 tausaga o le Fono Tele, o se galuega matagofie tele.

O le fesootaiga vavalalata a le Fono Tele a Ekalesia ma le Kolisi Faafaifeau i Malua, e vaaia ma molimauina pea i tausaga uma, i taimi e usuia ai le Fono Tele. O se taimi e tapena fiasia ai le Kolisi Faafaifeau i Malua, e ofo lana tautua, e auauna ai i le Fono Tele, i soo se mea e fianagalo ai le Laulau-a-fono ma le Ekalesia. E leoina e Faiaoga ma A'oa'o o le Kolisi Faafaifeau, le Fono Tele, ina ia mautinoa le saogalemu ma le lelei o taualumaga uma o le Fono Tele. E le gata i le auaunaga a Faiaoga ma A'oa'o, a e faapea foi o latou faletua. O Faletua, e

feagai i latou ma le teuina o le Falefono, o nofoaga e faatino ai fono a Komiti eseese, faapea le Malumalu o le Atua mo tapuaiga. E tapena a latou ie laulau, o le o le Laulau Faamanatuga, ma teu ina ia matagofie le faamoemoe o le Fono Tele. E le uma le tāua tele o le Fono Tele a le Ekalesia, i lana Kolisi Faafaifeau i Malua.

O nisi o Galuega a le Ekalesia na afua mai i le Tofa Mamao ma le Tofa Liuliu a le Fono Tele

E le faagaloina foi nisi o Galuega tetele, na ioeina e le Fono Tele, e pei o le Fale Fogafale Ono o le ‘Ioane Viliamu’ i Tamaligi, o le Maota mo Tupulaga i Mulinu, o le Falesa o le Iupeli Fou i Malua, o le Falefono i Malua, o le Fale Mafutaga Tina i Malua, o le Museum a le Ekalesia i Leulumoega ma isi galuega e tele. O nei galuega lelei uma, na mafai ona faatinoina, ona o le ioea a le Fono Tele.

E taua foi le manatua o le sao o le Ekalesia e ala i lana Fono Tele i le tulaga tau le a’oa’oina o fanau o le atunuu i Kolisi Mauluga, e pei o le Kolisi Papauta, Kolisi o Maluafofua, A’oga Tusiata a le Ekalesia, Kolisi o Leulumoega Fou, Kolisi o Nuuausala, Kolisi o Tuasivi, ma le A’oga Matata Eseese i Savaii. O le mautinoa o le fa’aauauina lelei o nei a’oga uma mo le manuia lautele o alo ma fanau o Samoa ma le Ekalesia, o le nafatausi lea a le Fono Tele i tausaga uma. E faamaite mai e le Komiti o Aoga a le Ekalesia, ia auala e mautinoa e lelei faatino ai mea e tatau ai, mo le manuia fa’aauau o lea faamoemoe taua o le Ekalesia, ona soalaupule lea ma faia i ai faai’uga talafeagai e le Fono Tele.

O le faasinoga foi lea o le fa’aauauina o le Galuega Faamisionare a le Ekalesia e pei ona feagai ma le Komiti Faamisionare. E talanoaina e fono faagasolo a le Komiti Faamisionare le faatinoga o le Galuega Faamisionare a le Ekalesia ona aumai lea i le Fono Tele, ni manaoga auā le faaleleia ma le faatumauiina lelei o le faatinoga, o lea fatuekalesia tausua a le Ekalesia. O le faasinoga foi lea mo Komiti uma a le Ekalesia, e pei o le Komiti Feau Eseese, Komiti o Atina’e, ma le Komiti o Tupe. O le mea moni, e le pogisa le ao, i le tautua a le Fono Tele, i le tauasaina ma le ta’ita’iina o le faatinoga o atina’e eseese a le

Ekalesia, e faalagolago lava i le faasinoga a le Agaga Paia, mo le manuia lautele o tagata Samoa.

O le Galuega a le Fono Tele, o Galuega Fa’aauau

O le galuega a le Fono Tele, o le galuega fa’aauau. O le a fitaituga ai le saofaiga a sui usufono o le Fono Tele o lenei tausaga, 2025, le tausaga ua faamanatuina ai le 150 tausaga o le Fono Tele. Afifio ai le Laulau-a-fono, Susū ai le Taitaifono, susuga i le Toeaina Faatonu ia Tunumoso Soliola Iosia; Susū ai le Sui Taitaifono, Susuga i le Faafeagaiga ia Esera Auatama Esera; Susū ai le Failautusi Aoao o le Ekalesia, Susuga i le Faifeau Fomai ia Taipisia Leilua; Susū ai le Teutupe Aoao o le Ekalesia, Susuga i le Faifeau ia Melepone Isara. E faamalumalu ai, le saofaiga a le Komiti o Tama o le Ekalesia, o le itufale o Tamā, e i ai le Komiti Faatonu, ma le Komiti a Toeaina, i le ta’ita’iga a lona Laulau-a-fono, Susū ai le Taitaifono, Susuga i le Toeaina Faatonu ia Asotasi Gu Time; Susū ai le Failautusi, le Susuga i le Toeaina Faatonu ia Amuia Seuala. Auai Komiti eseese o le Ekalesia ma o latou Laulau-a-fono, faapea le mamalu o usufono mai Matagaluega, Pulega, ma Aulotu mai Samoa nei ma atunuu i fafo. O le usugafono lea o lenei tausaga 2025, ua atoa i ai le 150 tausaga o le Fono Tele. Ia manuia le faatamasoaliiga auā le Atua ma lona finagalo.

Upu Faai’u

O le molimau a le alii papalagi o Ronald James Crawford, i le taofaiga o lana suesuega o le tala faasolopito o le LMS i tausaga 1830 i le 1880, na ia ta’ua ai, o se feteenaiga na i ai alii misionare ma tagata Samoa, e pei ona faamatalaina na afua mai ai le faia o le uluai Fono Tele, o se feeseeseaiga e tupu foi i isi nuu ma atunuu, na ave i ai e misionare papalagi le Talalelei ia Iesu Keriso. Fai mai le alii su’esu’e, o feteenaiga i le eseese o manatu o alii misionare ma tagata Samoa, i le tala faasolopito o le Ekalesia, o ni lagona na tutupu mai i le vaai a le tagata lava ia, mai lona siosiomaga na ola ma soifua a e ai. E malamalama lelei foi lea tulaga, e pei

ona finau tagata Samoa mai le latou foi vaai faa-tagata Samoa i le galuega a le Atua. A e o le tãua lea o le usuia o le ulua'i Fono Tele ma faasolo mai ai i isi tausaga, seia oo mai i le taimi na tutoatasi ai le Ekalesia Samoa mai le LMS. O le Fono Tele, na maua ai se avanoa, e o mai faatasi ai itu nei e lua (Papalagi ma Tagata Samoa) e talanoaina faafitauli na tutupu, ma ni ala e foia ai. E pei o ala e amanaia uma ai manaoga o itu e lua. Mulimuli ane, e le gata ua maua se femalamalama'iga o itu e lua, a e ua molimauina ai foi le aga'i i luma o le galuega a le Atua i Samoa ma le Pasefika.

E le po pea se nuu ona e le tuulafoa'ina e le Atua lana Ekalesia. E aogā mea e tutupu e iloa ai faatinoga e tataua ona fai, e maua ai se nofo lelei mo le manuia fa'aauau o le Ekalesia. O loo ta'ua i luga nisi o itu lelei o le Fono Tele, ina ua usuia le fono muamua i le tausaga 1875, e pei o le talia aloaia ai o le faauuina o a'oa'o ma faiaoga na i'u mai Malua, e avea ma Faifeau Samoa (FS). O le Fono Tele lea na faia ai le faau'uga muamua o Faifeau Samoa. O lona uiga, ua 150 foi tausaga, o sauniga o le faauuina o Faifeau Samoa. Na molimauina le taua tele o le i ai ma le toatele o Faifeau Samoa faauuina i lea vaiata. O le avea o Faifeau Samoa ma ta'ita'i o aulotu, na faatuputeleina ai le toatele o tagata Samoa ua fialia e auai i lotu ma avea ma tagata lotu o le Ekalesia Samoa LMS. Na iloa ai, o le malamalama lelei o tagata Samoa i le feau o le Talalelei, e tataua ona faataua ai fesootaiga i le gagana Samoa, o tu ma aganuu a Samoa.

O le isi tãua tele o le Fono Tele e pei ona taua, o le tãua o le amanaia o se leo o tagata lotu, e pei o tiakono, o a'oa'o fesoasoani, o Tina, ma tagata Ekalesia, i le soalaupuleina o mataupu mo le manuia lautele o le Ekalesia. E pei ona ta'ua, na vaaia e misionare, le lē atoatoa o i'uga fai a le Fono Tele i ni mataupu e aafia ai ai tagata lautele, ona e na o le aufaigaluega i Faifeau ma o latou faletua, sa auai. O le finagalo o alii misionare ma Faifeau Samoa sa i ai i Fono Tele muamua, e le o i ai se leo o tagata lotu, i mataupu ma atina'e talanoaina mo le Ekalesia. O le ala lea na talanoaina ai le mataupu lea ma avea ma iugafono a le Fono Tele i le tausaga 1873, e pei ona ta'ua i luga, le taliaina o le auai o tagata lotu, e fai ma usufono o le Fono Tele. O se tasi o laasaga taua i le faatinoga o le Fono Tele. Ua

avea ai le Fono Tele, o se taimi taua tele mot agata lotu e o mai ai i Malua, e auai ma faalogologo i mataupu e talanoaina i Fono Tele. O se miti lea mo le toatele o tagata lotu LMS ma le EFKS, ia maua se avanoa e avea ai ma usufono o le Fono Tele. O le lagona e masani ona faalogoina i tagata lotu: 'O le maua o le avanoa e usufono ai i le Fono Tele i Malua, o se taua lea o le ola taumafai e tautua ma auuina i le Talalelei a le Atua.'

E le galo nai tuaā na mua i malae, e le gata i le galuega o le faafoeina o le Fono Tele, a e o le talanoaina o mataupu e lelei ma aoga mo le Ekalesia. E i ai Laulau-a-fono o Fono Tele, o Komiti esee se o le Ekalesia, ma le Mafutaga Tina, o usufono uma, mai lava i le ulua'i Fono Tele i le tausaga 1875, e oo mai i le Fono Tele o lenei tausaga 2025. O i latou sa asaina le gasū o le taeao, e manatua pea lo outou sao. Pe galo ea i le loto, tou faiva, fitā, faa-soo. E foi ai i le Atua le viiga, i le fa'aaogaina o nai o tatou matua. Ia saga viia pea le alofa o le Atua, ona o lana Ekalesia.

Ia manuia tele le faamanatuina o le 150 tausaga o le Fono Tele a le EFKS, i lenei tausaga 2025.

Tusia: Susuga Professor Dr. Vaitusi Nofoaiga FS, Faifeau Pule Kolisi Faafaifeau Malua.

Feau o le Aso ia Iuni

Aso Faraile, 13 Iuni 2025. Tusi Faitau: 1 Timoteo 2: 1 -10.

Manatu Autu: O lē ta'ita'i ma lē mulimuli (*The leader and the led*)

O le faamalosi'au a le ta'ita'i toeaina o Paulo, ia Timoteo le ta'ita'i talavou o mulimuli atu i le galuega tala'i, ina ia tau fai faamalolosi e tatalo mo le galuega tala'i, faapea tupu ma ta'ita'i, i latou o i tulaga maualuluga o i ai le pule i malo ma soo se faalapopototoga. O i latou uma nei (Paulo, Timoteo, tupu ma ta'ita'i), o tagata soifua e ao ina mulimuli

i le finagalo paia o le Atua, o Le ua fa'aali tino mai e ala i le tagata o Iesu Keriso lona Alo pele e toatasi.

O loo faapito le apoapoa'i a le aposetolo iinei, ina ia talosia faauluuluga o sosaiete, i latou o i ai le pule, ina ia mafai ona latou ta'ita'i tagata i auala tonu e tusa ma le pule a le Atua e ana le pule uma lava, *“ina ia tatou nonofo ma le lē atuatuvaale ma le filemu, i le amio Atua uma lava ma le amio matagofie, auā o le mea lelei lea ma le mālīe i luma o le Atua lo tatou Faaola.”*

E afua mai mauga manuia o nuu. O ta'ita'i ma ulu o aiga, nuu, malo ma Ekalesia, e faamoemoe i ai tagata lautele o latou ta'ita'iina, mo so latou manuia. Ina ua ta'ita'i ma le alofa ma faamaoni. A o tagatanuu foi e i ai le tiute ina ia āva ma usiusita'i i e tatau ai. O le faatinoga o lenei fa'aaloalo ma alolofa i ta'ita'i, e aofia ai le fai o talosaga i aso uma, e talosia ai ta'ita'i. Ia tuu i le Atua o tatou ta'ita'i e ala i le tatalo, ina ia latou maua faamanuiaga e tatau ai, aemaise ia ola i se soifuaga mata'u ma faatuatua i le Atua i le faatinoga o latou tiute faata'ita'i.

Ua talafeagai lenei feau mo i tatou le au faatuatua i nei aso. Ua maitauina ua mafuli nisi i le faamasinosino ma tusitusilima i ta'ita'i, ua faaseā ma faitio, tau le pua ma lafo. Aemaise i lenei lava vaitau o tapena mo palota e saili ai ta'ita'i o le malo. A o le a sa tatou galuega o fai, ina ia faaleleia ai pe afai ua manatu ua lapelapea la latou ta'ita'iga? O la tatou feau lea ua faamanatu mai, ia tatou tatalo e lē aunoa mo i latou, ina ia alofa le Atua faamagalo o latou masei, ma ia latou maua auupega a le Agaga, e ta'ita'i ai ma le tonu e tusa ma le finagalo o Keriso le Ta'ita'i Sili. Pe afai foi ua faamanu'alia finagalo i a latou ta'ita'iga, o le a'oa'oga a Iesu, ia tatalo ma faamanuia i e ua agaleaga mai, i latou o fai ma fili. Fesoasoani mai le Agaga. Amene.

Aso Toonai, 14 Iuni 2025. Tusi Faitau: Iakopo 5: 13 – 18

Manatu Autu: O le Mana o le Tatalo faatasi (*The power of Praying together*).

Na amata lenei vaiasosa i le afio ifo o le Agaga Paia i le Aso Penetekoso, a o potopoto faatasi le nuu,

ma faavaeina ai le Ekalesia - o le Ekalesia tatalo. Ua faai'u i le faamanatu mai a le aposetolo, i le tāua ma le aogā, e tatau ai ona tatalo malosi ma tatalo faatasi - e i ai le mana i le tatalo, e le gata ina tatalo toatasi i le mea lilo, aemaise le tatalo toatele, tatalo faatasi. O le Au Leoleo a le Ekalesia ua faasino i le tino tatalo o le Ekalesia. O i ai se tou Au Leoleo? Afai e leai, o lona uiga ua faavaivai i le tatalo, ua lē talitonu i le mana o le tatalo, pe ua lafoa'iina foi le malosi lilo e gafatia ai le molimauiina o le Tala Lelei.

O loo faamalosi le aposetolo o Iakopo i le Ekalesia lautele o salalau solo, le au faatuatua ia Keriso i le amataga mai o le Ekalesia, i auala o faamalologa i ia ona aso: *“Ua ma'i ea so outou? Ina aami atu ia i toeaina o le ekalesia, ia latou tatalo mo ia, pe a uma ona faauu ia te ia i le suauu i le suafa o le Alii. O le tatalo foi e faia ma le faatuatua e faaolaina ai le ma'i, e faatuina foi o ia e le Alii...”*

Ua lē faamalosi e lenei auala i nei aso, auā ua tatou talitonu, ua tele foma'i a'oa'oina lelei mo le galuega faamalolo, o la latou nafatausi lea; a e o faatasi ma le tiute tatalo o le Ekalesia e faamanaina ai togafitiga. O le tatalo o loo taulamua ai toeaina ma faifeau.

O le gasegase o loo mana'omia tele ai talosaga i aso nei, o le gasegase faaleagaga i pulega ma ta'ita'iiga. Ua saga faamalosi'au ai le feau o lenei aso ma aso uma, i le soifua tatalo o le au faatuatua. Afai sa leai se timu i Isaraelu, i le tolu ma le afa tausaga, ma toe timu mulimuli ane ai, ona o le tatalo a Elia e toatasi, e mafai foi ona tatou faamaloloina le gasegase o malo ma ma'i o vaivai ai le Ekalesia, pe a tatou faamalolosi ma faatuatua, i le tatalo pea lava pea, auā e i ai le mana i le tatalo tuufaatasi. Ia manuia le alo atu i le Aso Sa. Ia i le Atua le viiga. Amene.

Aso Sa, 22 Iuni 2025. Tusi Faitau: Isaia 45: 1 – 7

Manatu Autu: E leai lava se tasi (*There is none other*).

O upu faamafanafana mo se faamoemoe o le nuu o le Atua, a o i ai i le Tafeaga. O loo ta'ua ai Kuresa

le Sili, le tupu o Peresia, e auala mai ai le faaolataga mo Isaraelu, auā o lana tulafono lea ina ua ia faatoilalo Papelonía - ia faasa'oloto tagata ese uma (aofia ai ma Iutaia) na aumai e Papelonía, ina ia toe foi i o latou nuu moni. O le ala lea o le manatu ai o nisi, o Kuresa o loo faasino i ai le Mesia na valo'ia na te aumai le faaolataga. Peita'i, o loo manino fetalai a le Atua e ala mai ia Isaia, "e leai lava se tasi", a e na o le Atua, o Ia e ana le pule ma le malosi, e afua ai le faaolataga. O Kuresa ma Peresia ua na o ni auauna e fa'aaoga e le Atua, e auala mai ai le saolotoga o lona nuu. E pei lava foi ona sa Ia fa'aaoga muamua Nepukanesa ma Papelonía e fai ma ana auauna e faatonu, sasa ma a'oa'i ia te i latou. E pule le Atua i le tagata na te filifili ma fa'aaoga, pe o se tasi e talitonu ma mata'u ia te Ia, pe o se tagata o nuu ese, e faatino mea e finagalo ai o Ia. E ao ai ona tatou talia soo se tasi na te faia le galuega alofa, fesoasoani, faaola, mo i tatou, a e 'aia le fesiligia pe o se kerisiano pe leai, pe faapea seiloga o kerisiano faamaoni ona taliaina lea; auā e leai lava se tasi e ana le pule aoa o tofia, na o le Atua Tolu Tasi Paia e toatasi. O se feau faamanatu tāua mo i tatou pe afai e filifilia, ia faimeia faalogo i le faasino mai a le Atua e manuia ai, auā e tonu ma sa'o atoatoa; a e 'aia le faia ana feau i o tatou manatu faaletagata, auā e lilifa lava ma pispisia i le loto lea, manatu faatauvaa, ma isi vaivaiga faaletagata. Pe afai foi o loo e faitau mai, a o loo e sauni i se faiga filifiliga – fai ma sui o se komiti, se faiga filifiliga mo se faifeau a se aulotu, i se avanoa faigaluega, ma soo se tofi e pei o le aveia ma faipule i le palota a le atunuu o sauni, ia manuia lou faamoemoe; a ia e manatua 'aia ne'i galo, e leai lava se tasi na te faia tofiga, na o le Atua e toatasi, na o Ia foi e manuia ai ou faiva. O le a lou faatauvaa, e fa'aaogaina lou faatauvaa e faailoa ai le mana o le Atua; 'aia e te manatu faamaualuga o sou poto ma le atamai ua e agavaa ai, pe filifilia ai, auā o Ia na tofia Saulo e fai ma tupu, o Ia foi na toe sasae ese le malo mai ia te ia. E leai lava se tasi, na o le Atua.

Aso Lua, 24 Iuni 2025. Tusi Faitau: Isaia 49: 7 – 18

Manatu Autu: E lē faagaloina oe. (*You are not forgotten*)

O Iutaia o loo nofo pologa pea i nuu ese, i le loloto o tiga; a ua tusi faamafanafana, faaloto tele atu i ai le perofeta, i le gagana e peisea'i ua uma ona faasaoloto i latou. Ua uma, ua taunuu, ua faia. O le gagana o le mautinoa o le faaolataga, ma le moni o le saolotoga, e faia e le Atua auā ua Ia fetalai, e taunuu lava foi. O upu faatupuola, faatupu faamoemoe; e ta'u mai ai le alofa faamaoni o le Atua, na te lē faagaloina lona nuu.

E pei lava o le alaga a Iesu i luga o le satauro, le ituaso aupito tiga ma pogisa o lona soifua, a e na Ia alaga ai, "Ua taunuu, ua uma, ua faia". Na te le'i faagaloina se tasi o i tatou, e ui ina o i tatou o tagata agasala. O le mautinoa o le saolotoga moni, le faaolataga tumau mo tagata uma e salamo ma faatuatua ia te Ia. Le saolotoga ua faia i Lona tino momomo ma lona toto maligi. E faamaoni le Atua i ana folafolaga. Ua na ta'utino mai le faamoemoe mautinoa mo i tatou; peitai, e umi se taimi e va ai (e pei o folafolaga o le A'e o le Tafeaga), faato'a tino mai ma taunuu lena faamoemoe. E ao ai ona tatou onosa'i ma talitonu i le faamaoni o le Atua.

E i ai nisi taimi tatou te laa atu ai ma le faatuatua, a e lē iloa atu lava se suiga iloga, ni suiga e iloa ai ua tali mai le Atua. E pei o se paluni e feula ia tumu i le 'ea, na o le paluni e faasolosolo ina lapo'a, a e leai se isi suiga tele. Tatou te lē iloa atu i totonu, le tele o le taotaomia ma saisaitia o le 'ea, se'ia oo ina tupu mai se suiga tele - e pa le paluni, salalau solo pa'u paluni, ua matala saoloto mai i fafo le 'ea, ua te'a le taotaomia, matala noataga na saisaitia ai.

Mata o loo e lagona i nei aso le saisaitia, taotaomia pei o le 'ea i totonu o le paluni. A ia onosa'i ma faamoemoe, faatalitali ma faalagolago i le Atua, na te lē o faagaloina oe, e lē o toe mamao a e malepe ma toilalo mea o loo latou saisaitia oe. Pe mata foi o lena ua pa le paluni, a e o loo fenumia'i faapa'u paluni lou si'osi'omaga; o le amataga lena o suiga tetele ua faia, i le faasaolotoina o lou agaga. Manatua, ua uma ona fetalai le Alii, 'Ua taunuu, ua uma, ua mautino ua na faia.' Aua e te masalo vale, a ia talitonu, e lē o faagaloina oe ma a'u e lo tatou Alii. Ia manuia lavasiga o lenei aso. Ma ia ia te Ia le viiga e faavavau. Amene.

Aso Lulu, 25 Iuni 2025. Tusi Faitau: Isaia 51: 1 – 6

Manatu Autu: Faamafanafana tusa lava poo le toafa.
(*Comfort even for the desert*)

E leai se tagata e fia nofo i se toafa, po o nofoaga e pei lona si'osi'omaga o le toafa. E i ai taimi tatou te faamasino ai nisi tagata ua feagai ma puapuaga, ua nonofo i le toafa, ona o le tau i a latou lava amioleaga. Peitai o le toafa o loo i ai nisi manuia o loo lilofia ai i lalo o lona oneone ma lona pefu. O le aga'i atu o Isaraelu mai Aikupito i le nuu folafolaina, na le'i 'alofia le ui atu i totonu o le toafa. Na filifili e le Atua le auala lea mo lona nuu, ia a'oa'oina ma saunia ai i latou e fetaia'i ma lu'itau tetele o le olaga. Na filifili Ioane le Papatiso e fai lana galuega i totonu o le toafa. Na ta'ita'iina foi Iesu e le Agaga Paia i le toafa, ina ia tofotofoina ma faaososoina ai i le mae'a ai o Lona papatisoga. E tutusa le toafa ma isi foi nofoaga – e ave a o nofoaga e valaauina ai, e tofotofoina ai, e faatuputeleina ai, e fanaufouina ai. Mata o lona ua e i ai i totonu o se si'osi'omaga pei o toafa, peitai e lē o lona uiga ua sesē le nofoaga, pe leaga le nofoaga, pe ua aunoa oe ma le Atua i lona nofoaga.

O le feau mo Isaraelu a o latou i ai i le Tafeaga, o le toe vaai ifo ia i latou lava, lo latou faasinomaga, i lo latou Atua na latou osi feagaiga, ma le pologa ua latou i ai nei, ona o lo latou solia o le feagaiga. O lo tatou faasinomaga o loo maua'a i le faavae, o i tatou na faia i le faatusa o le Atua - a e lē o le si'osi'omaga ma tulaga faa toafa tatou te oo i ai. O le upu moni pe a tatou onosa'i ma tauivi, ona iloa lea o le fepulafi matagofie mai o fetu o le lagi i le taaligoligoa o le po, o le leo taalili o le agi o le savili, ma le faafuase'i ona maua o se vai, po o se faaputuga o vaovao ma laau lanulau'ava. E liua e le Alii le toafa e fai ma fanua lafulemu.

A o tatou i ai i lenei vaitau o le fenumia'i o upufai o malo, ua pei lo tatou atunuu ua nonofo i le toafa, ona o le amio a nisi o tatou ta'ita'i iloga, i le sailiga o le paoa ma le pule, le mamalu ma le 'oa; ua matūtū le laufanua o le alofa ma le faamaoni, ua mago le si'osi'omaga o le amiotonu ma le tautala sa'o, a ua agi malosi le savili o le pepelo ma taufaavalea, o faiga pi'opi'o ma le lē matata'u i le Atua, ua pei o

le oneone le lē mafaitaulia o ituaiga soliga tulafono eseese. Talofa e, i le atunuu o faavae i le Atua.

Ui i lea, ia tatou onosa'i ma faatuatua i le Atua. Tatou talitonu o loo i ai nisi faamanuiaga sili o loo tanumia i lalo ifo o nei faiga faatoafa. E faamafanafanaina i tatou e ui ina o le toafa, a e i ai le taimi o le Atua, e fa'aalia ai lana pule aoao, lona mana ma lona alofa, e faatoilaloina ai le fili ma ana 'au, a e pule le alofa ma le amiotonu, le filemu ma le olioli; e faalumaina le faamaualuga ma le faasausili, a e faaeaina le loto maulalo ma le agamalū, le amio matata'u i le Atua ma fai lona finagalo. Amene.

Aso Tofi, 26 Iuni 2025. Tusi Faitau: Isaia 52: 7 – 10

Manatu Autu: Filemu ma le Faaolataga (*Peace and salvation*)

E tuufaafegai le tulaga mālū o le filemu, ma le loulouā o le vevesi; e eseese mamao le matagaofie o le faaolataga ma le tiga o sauaga. E lē faatusalia le faanoanoa o le Tafeaga, ma le olioli o le Toe A'e/ Toe Foi o le Tafeaga mulimuli ane e pei ona faalauiloa e le perofeta o Isaia. "*E matuā matagofie i luga o mauga o vae o le ua fai mai le tala lelei, o lē logologo mai le manuia, ua tala mai le tala lelei; ua faailoa mai le olataga; ua fai mai ia Siona, O loo pule lou Atua.*" Mo Isaraelu i le tafeaga, ua lava ma totoe upu faalototele, faafiafia loto ma faamafanafana o loo alaga atu ai Isaia, e fai ma vai mālū e mapu ai lo latou tiga ao feagai ma puapuaga o le tafeaga. E le gata o le faalogo atu i ai, a ua mautinoa i lo latou faatuatua, e moni lava ma e taunuu lava i aso ma taimi ua finagalo ai le Atua. O le filemu ma le faaolataga o mea patino i le Atua na pule, na te amatamea, na te faatino ma faataunuu. E leai foi se tagata poo se malo, i sona ma'ema'e ma sona malosi, na te tofotofo e toloa pe faalēaogaina lea manuia mai le Atua.

O loo o'u i ai nei i se tulaga o tiga ona o le mataupu tau le penisione - ua teena la'u talosaga ma le faamoemoe e malolo faa-penisione i lenei tausaga, ua aulia ai lo'u 70. Sa talosaga i luga o le faasinoga a le Faavae (i ona upu ma mata'itusi faaSamoa ma le faaPapalagi) ou te agavaa ai; peita'i ua lē o gatasi le futia ma le umele, ina ua ese le faatofalaiga a le

Komiti a Tama o le Ekalesia, e tusa ma lana faauigaina o le Faavae. O se tiga e matuitui, ina ua lē amanaia se tautua faatauvaā mo le 37 tausaga; ua lē aloaia se auunaga sa faia - sa tausi nuu mo le 12 tausaga, ma galue pea faalausoso'o i le tele o nisi o tofiga, e oo mai i le taimi ua atoa tausaga faasino mai e le Faavae, a e paga lea, ua lē taulia. Tuu ia le tulaga tau faamanuiaga i tupe, o se mea faatauvaā lea; a o le itu e sili ona tiga, o le lē amana'iaina, ia auai i se sauniga e aloaia ai se galuega sa fai mo le Ekalesia. E faaopoopo i lena, le oona o le tau solomua i le tamā o le Matagaluega, ona ia toe faasolomuli ese mai le mataupu, e pei ona faamauiina ai i le faai'uga.

Ui i lea, ua ou talia lena faai'uga ma le loto maulalo; ua ou faamagalo foi. A e fia faailoa pea, e tusa ma le feau o lenei aso. Ou te lagona pea le filemu ma le mafanafana, i le faatuatua o loo silafia e le Atua e ana le galuega, le amiotonu pe leai foi o faai'uga ua fai. O Ia e pule, o Ia foi e faia le tau i lana aufaigaluega. Ou te talitonu i lona alofa, ma lana faamasinoga tonu, na te faia le mea e sili mo i tatou taitoatasi, i lona lava taimi, i ana lava auala. O le faatuatuga lea ua maua ai le filemu ma le faaolataga, a o i ai i taimi faalaulau toafa o mea e tutupu. E faapena foi a o siosiomia i tatou i manu'anu'a ma gasegase faaupufai o malo i lenei vaitau; e lagona lava le filemu ma le mafanafana, auā e lē valea le Atua, e sili ona atamai o Ia, e faamasino ma le tonu, e faamaoni ma alofa, i e matata'u ia te Ia. Ia totofi mai e Ia ni ta'ita'i faalemalo, e faia lona finagalo, ma maua ai e tagatanuu o Samoa le filemu ma se faaolataga i aso uma o le soifuaga.

Aso Faraile, 27 Iuni 2025. Tusi Faitau: Isaia 54: 1 – 8

Manatu Autu: O le alofa faavavau o le Atua (*God's everlasting love*).

O le ata faatusa o loo aumai i le faitauga o le asō, o se tina nofo toatasi o faapo'ululu ma le faanoanoa i totonu o lona fale'ie; ua tuua o ia e lana tane, atonu ona e lē alo o ia - e leai sana fanau. O le masiasi ma le faalumaina, pau ia o ana paaga; ua leai faamoemoe, o lona lalolagi ua masofasofa ma ua tauau ina musu i le olaga, ua siilima. Ma o totonu

o le fale'ie lea, ua silasila ma fetalai i ai le Atua, "*Ia faalautele le mea e tu ai lou fale'ie; ia faloina ie puipui o mea e te nofo ai... 'aua e te fefe, auā e te le ma, auā foi e te masiasi, auā e le faamaina oe...auā o Le na faia oe o lau tane lea, o le Alii o 'Au o lona igoa lea; o Le na faatauina oe o le Paia o Isaraelu lea; e taua o Ia, o le Atua o le lalolagi uma.*" O le faatusa ia Isaraelu ina ia fialia ma lototele, o loo sauni mai le Atua na te faia le faaolataga mo i latou. O le faatusa foi mo soo se tagata o i ai i tulaga faanoanoa ma atuatuvaale o le olaga, ina ua 'aua le popole ma atuatuvaale, o loo silafia e le Atua tulaga uma o i ai, ma ua sauni o Ia e fai suiga lelei ma le tetele e faafiafiaina ai.

E i ai taimi e faapea ai lo tatou lalolagi, ona o mea e tutupu; o faalavelave ma faafitauli tatou te le'i mafaufauina, a ua le maalofia lava le tula'i mai, ma afaina ai taualumaga o aso taitasi. E ala mai le malamalama o le taeao a o loo pogisa pea le loto ma le mafaufau, e tauamo le masiasi ma le faalumaina, na o le mana'o e liu loi pe goto ifo i le eleele e lafi lilo ai. E leai se tagata o toe fia fesoota'i mai, ua 'alofia e tagata uma. Ma e pei o le fafine sa nofo toatasi i le fale'ie, e faapena o tatou lalolagi i taimi faapenei, ua na o tatou lava e leai se isi na te faamafanafana mai.

Peita'i, o le faalumaina ma le inosia e lē o le itulau mulimuli lea; e susu'e e le Atua le isi laupepa fou i o tatou olaga, na te silasila ma fetalai mai, 'Ia faalautele o tatou fale'ie, ia faloina faamalolosi ie puipui, ia faauumi maea ma faamalolosi fao' – ia sauni mo mea tetele o le a faia e le Atua. Ne'i manatu o le toasa o le Atua ua mafua ai, ua fetalai o Ia, ua na o se emo o le mata lea, a o lona alofa mutimutivale e faavavau, na te liua ai loimata e maligi i le tagi, e aveā ma punavai o le olioli ma le fialia. E faia e le Atua le faaolataga mo i tatou, a o silamiō ma molimau i ai tagata amioleaga na latou lafoa'i i tatou.

O le feau taua mo i tatou, pe afai tatou te iloa atu nisi uso, tuagane ma tuafafine, o tauau ina malepelepe ma masofasofa o latou fale'ie, ina tatou ofoina atu i ai se galuega alofa e lavea'i mai i latou mai le siilima, a ia toe maua se isi malosī fou ma se faamoemoe fou e fa'auau ai pea i luma. Manatua foi le fafine Samaria sa malepelepe lona olaga, na toe avatu i ai e Iesu le faamoemoe fou, na inu i le

vaiola ma avea ma misionare mo lona nuu. O Iesu na afio mai e faaola, a e le o le faasala ma faamasino. Auā o Ia le Atua e faavavau lona alofa.

Aso Toonai, 28 Iuni 2025. Tusi Faitau: Isaia 55: 1 – 11

Manatu Autu: O le foa'i a le Atua (*God's offer*)

Ua alu lenei vaiaso o tatou vaavaai ma le ofo i le faaolataga a le Atua i auala eseese, e ala mai i lana auauna o Isaia, i lana faamafanafana mo lona nuu o Isaraelu. E mafuli lava nei faamafanafana ia Isaraelu, aemaise e faasino i le Isaraelu e toatasi, po o le soifuaga faalefaatuatua o tagata taitoatasi. A o le faitauga o lenei aso, ua faamamafa ai le faaolataga mo tagata e toatele, o tagata uma, aemaise o faiga malo ma pulega e le na o Isaraelu, a e aofia ai ma soo se atunuu – o nuu ese. *“Faauta, e te valaau i nuu ese sa e le iloa; o nuu ese foi sa latou le iloa oe, latou te taufetuli mai ia te oe, ona o le Alii lou Atua, ma le Paia o Isaraelu;”*

O se tasi lea o itu e faamamafa i lo'u manatu, e tusa ma le mataupu sa ou ta'ua i la'u penisione. E le faapea ona o a'u; a e aofia ai le manatu alofa i le toatele o le au uso a auauna, latou te lē o maua lenei faamanuiaga, sa fuafuaina mai e tamā o le Ekalesia ua lagomau mai ti'asā. O le foa'i a le Atua e lē faapito na o se vaega, e lē faapumoomoo, a e tatala le avanoa mo soo se tagata e agavaa ai.

O lea ua ofoina mai e le Atua faamanuiaga sautualasi, e maua e tagata taitoatasi, faapea foi i faigamalo; o Isaraelu foi faapea ma nuu ese. O le tamaoaiga i vai ma taumafa, o tupe ma le 'oa i oloa ma le tamaoaiga foliga eseese, o faamanuiaga i le tino; faatasi ma le tamaoaiga faaleagaga, o le filemu ma le manuia o faiganuu lelei, o pulega amiotonu ma le alofa i soo se tagata, e le faailoga lanu pe faailoga tagata. O le foa'i a le Atua e le gata i manuia foliga sautualasi, a o lana foa'i e taualuga i le soifua o lana auauna, le Mesia na faamaite mai totonu o le Tafeaga, lana Auauna Puapuagatia – o Iesu Keriso le Mesia valoia. Lea na amata mai le Aso Sa o ta'u ai Kuresa le Sili; peitai o le auauna moni e faia le faaolataga moni mo tagata uma i soo se auga tupulaga, o le Keriso puapuagatia lea, le Foa'i ma le Taulaga a le Atua mo i tatou uma. O ai e salamō

faamaoni ma faatuatua atoatoa ia te Ia, e lē fano lava se tasi, a e maua e ia le ola faavavau.

Ua faamanatu mai ai le feau o lenei aso, a o tau faai'ui'u lenei afa tausaga, ma tatou aga'i atu i le afa lona lua o le tausaga, o le vaitau o faiga taulaga masani a le Ekalesia. Ina ia tautuana lau foai, e ala i Faiga Taulaga e masani ai; ia fai ia lelei, le aofa'iga ma le agaga e fai ai. Manatua o le foa'i lelei, o le foa'i e tupu ma saga faaopoopo atili, e i ai le faasiliga mai lena tausaga, a e lē o le toe pa'u i lalo. Ia manuia lau foa'i, ma ia i le Atua le viiga e faavavau ona o Lana foa'i. Amene.

(F. Tolua)

O LE PEROFETA MULIMULI

Na maitauina e Savina o latou foliga mata ataata. Na fetufaa'i i tala fiasia tamaiti matutua, a o nonofo solo le au laiti, taumafai e faate'a le fefe. E tuufaafegai ma le au pito itiiti sa i ai, i latou i lalo ifo o le lima tausaga ma laiti tele mo latou totoga tui. O le toa laiti lena sa fifilemu ma e le'i ano ane, na fa'aalia ai laasaga eseese o atamai faapitoa e le'i togafitia: o le nofonofo filemu, o le sioa i le vasa loloa, faate'ia i le genogeno soo.

E to'afa faia'oga na latou faamaopoopoina le ta'ito'a onosefulu o i latou.

“Nonofo ia outou vaega!”

Na faatali le nofoaafi i tala atu o faitotoa patatū i tua o Keleniapisika 88. O le ia aveina atu tamaiti mo sina tafaoga puupuu. O le au laiti sa masani ona maua lea faamanuiaga, a o le aso lenei o le nofoaafi na alu i le malaga tuu tasi. E lē toe foi mai, pe a tau mai i le i'uga i le ogatotonu o Gaioiga Saturina.

O tua atu o tau'au o Savina, na autilo ifo ai, atu falega ma potu o le nofoaga tuai o atina'e faa Sovieta, i luga o tamaiti ma mata gaogao 'i'ī. Sa faapena foi i faiaoga sa i ai le vaaiga taufaafefe, e ui ina o latou upu foliga fiasia.

“Ua uma ona inu a outou vailaau?” na valaau atu ai se fafine faiaoga

O le vailaau o se vaitui sa fefiloi ma se vailaau o kasa faaleitiō. E ui ina fiasia ma mata ataata nei, a e

o le isi itula o le a faaopeopea ai i se fiamoe e lē saogalemu. O le a fesoasoani e faaitiitia se lagona sagisagi pe afai e pa pa ni pomu i le taufaasi'usi'uga o le ana, ma le amataga o le Gaioiga Saturina. O le ulua'i faaputuga o vai e masa'a atu i le ogatotonu o le ana, ma le pa pa o kasa e mulimuli atu ai, o le a faaliliuina le lagona aafia i totonu o le toto o tamaiti, e avea ma vailaau fasioti neura, na te fasiotia ai i latou i lea lava taimi.

O le vasega lenei sa manatu e na o le faaumatia o le ola o tamaiti e ala i tuioti, peitai o lenei auala fasioti tagata e faigata tele, tusa pe a'oa'oina lelei ai se isi, e totoi na te faia. E faaopoopo i lena mulimuli ane, o tino oti laiti galemulemu uma o le a tulei, la'u i uta a loli, ma avatu i le fatu ogatotonugalemu o Gaioiga Saturina. O le fuafuaga mo le faakasa, faamalepe mo le vaiaso, a o sasa'a ese le vai, ina ia susunu ai tino oti ma ia faaleaogaina ai ni faailoga o tamali'iaga o tamaiti – pe afai lena e i ai se tagata e ma'ema'e ona faalatalata i tino. O le laasaga maua lauga ua faakasa oona ai totonu o le ana, na te teena ai soo se taumafaiga e ulufale ai se tasi mo le tele o tausaga.

O le mea lea i le faai'uga, o le fuafuaga i le taimi nei sa faapea ua lava tapena, e itiiti le tiga, ma ofoina mo tamaiti se taimi mulimuli o le fiafia ma le faamalieina.

Ui i lea, na tu pea Savina ma ona lima i ona tua. O ona lima na faamau oomi faatasi i le papa'e o ona ivi, e taofia mai o ia i lona aapa atu e tatoso ese mai tamaiti mai le nofoaafi.

Peitai na ia lavea'iina mai le toasefulu.

Na faamafanafanaina o ia i lea mea moni.

O le toasefulu e silisili.

Na latou nonofo tumau i le fale i ona tua, i le mea o i ai le fale e faatonutonu atu ai Gaioiga Saturina. E uma atu loa iinei, ona aveina atu loa lea o le toasefulu o Omega i le nofoaga fou i Mosokou. Ua oo mai le taimi mo le poloketi e a'e mai i fafo mai le pogisa, i fafo i le malamalama o le la.

O lona lea talaaga faalauiloa.

Peitai o lenei faaeaina e i ai lona tau.

O le manino o laumata fiafia ma le alaga o le leo olioli na mou malie atu i tua o tamaiti mulimuli. Na

latou finau poo ai o le a ti'eti'e atu i potu matala o taavale koale, a o ai o le a nofo i taavale pito i luma ma tua. Na o ni nai tamaiti matutua sa manatu ifo faapea, pe aisea ua o ai na o i latou aunoa ma ni tagata matutua, peitai o nei foi manatu sa sili ona leo fiafia, a e le'i manatu mamafa i ai.

Na uma loa ona faae'e tamaiti mulimuli, ona minoi loa lea o le nofoaafi, ua 'e'e lona pu ma 'i'i ona taofi, ma ina ua emo le eletise, ona taavale ifo loa i lalo o le ana. O taliega ma tau valaau fiafia na mulimuli atu ai. O se minute mulimuli ane, na tapuni lemu ai faitoto'a palasi i le faasi'usi'uga o le ana, na tapunia atu ai ma o latou leo fiafia.

Na savali ese atu faiaoga e toafa. E leai se tasi na talanoa i se isi. Sa le'i i ai ma so latou fesootaiga. Vagana ai se faiaoga mafiafia lona puimanava na la'ei i se talielele faagata i tulivae. A o ia pasi ane, na sii a'e lona lima e faamafanafana ia Savina, ona toe sui lea o lona mafaufau, ma toe tuu i lalo lona lima.

“Sa mafai lava ona e nofo ‘aue e te sau,” o le musumusumu atu lea a le fafine.

Na savali ese Savina aunoa se upu, na te le'i talitonu i lona leo.

Ioe..Ioe, na ou sau.

OSIGA FEAGAIGA EFKS **HUTT VALLEY**

O le Aso Faraile 20 Iuni 2025, na osi ai le feagaiga a le EFKS Hutt Valley, i le Pulega Ueligitone i Saute, o le Matagaluega Laumua o Aotearoa, ma lo latou faifeau, susuga Kereveta Tiumalu FS ma le faletua ia Faanaitaua. O le Toeaina o le Pulega Ueligitone i Saute, susuga Vaegaau Liko FT (EFKS Upper Hutt) na ta'ita'iina le sauniga, ma osi le feagaiga a le Aulotu ma lo latou faifeau; o le Tusi Paia na faitauina ma le Lauga foi na saunia e le susuga Isamaeli Aula'i FS (EFKS Newton), a o Tatalo na ta'ita'iina e le susuga Fereti Tutuila FS (EFKS Petone). O le sauniga na faatumulia ma molimauina e le mamalu o aiganalua, aemaise le paia o le Ekalesia i susuga

Toeaina ma latou Faletua, o le aufaigaluega galulue i aulotu ma faletua, o faifeau ma a'oa'o nofo aiga, a'oa'o fesoasoani ma tiakono ma o latou faletua, ma le mamalu o le Aulotu, le Pulega ma le Matagaluega i le Laumua o Aotearoa.

O le EFKS Hutt Valley na tausia talu ai e le susuga i le Toeaina ia Faatulituli Setu FT ma le faletua ia Meripa, na malolo penisione i le Fono Tele 2024. O le susuga ia Kereveta na ulufale i Malua i le tausaga 2018, mai le Aulotu EFKS Southwest Brisbane, a e na i'u mai ma lona faailoga o le Bachelor of Theology i le 2021. O le 2022 na galue ai o ia i le Ofisa Tutotonu o le Ekalesia i Tamaligi, i le vaega o le Toomaga i lalo o le Matagaluega o Tupe, se'ia oo ina valaauina mo le galuega tausii nuu. Sa tautua i la'ua i le EFKS Vaitele-uta, Faleata i le ta'ita'iga a le susuga Muao Fagasua FS, ma faau'u ai i le tofi Faifeau Samoa i le Fono Tele 2024.

O le susuga i le faafeagaiga ia Kereveta o le lupe faalele a aiga ma afioaga o Nuusuatia, Satapuala ma Vaitele-uta, a o le faletua ia Faanaitaua o se taulaga soifua a aiga ma Ekalesia i Faatoia, Leauvaa ma Falealupo. Na taualuga le sauniga i le Sakarameta paia o le Faamanatuga na ta'ita'i e le susuga ia Kereveta FS, ma faagasolo ai le aso i polokalame masani, o le faalauiloga o le IE o le feagaiga e faamautu ai osiga feagaiga e tusa ma le aganuu mamalu, ma faai'u ai i tausamiga ma fa'aaloaloga mauualuluga na ma'au i ai aiga na lua ma le Ekalesia i Hutt Valley.

Ia manuia le alo atu i le galuega, o le fai ma auauna o le Upu ma Sakarameta, o le Leoleo Mamoe i le lafu mamoe a le Atua, ma le faasalalauina o le Tala Lelei ia Iesu Keriso, ma ia avefa'olotu soifua galulue faatasi ma le EFKS Hutt Valley, e manuia ai le Ekalesia a e faateleina ai le viiga o le Atua.

(Faatonu Sulu)

OSIGA FEAGAIGA EFKS **ROCKBANK**

Ua faaopoopo le isi Aulotu fou i le Pulega a Melepone Matu & Perth, o le Matagaluega Vitoria, e ala i le **EFKS Rockbank**, na osi le latou feagaiga ma lo latou faifeau, susuga **Satala Sa'u FS** ma le faletua ia **Sapi** i le Aso Toonai, 28 Iuni 2025. O le sauniga o le Osiga Feagaiga na ta'ita'iina e le Toeaina o le Pulega, le Toeaina Faatonu o le Matagaluega Vitoria, susuga Aviti Etuale FT ma na faatinoina vaega uma o le sauniga – Tusi Paia, Tatalo, Lauga ma le Osiga Feagaiga. Na auai e molimau le Toeaina o le Pulega Melepone Tutotonu, susuga I'aeva Lagaia FT (ua sui tulaga ia Paul Gray ua Penisione), le Tiakono Toeaina o le Matagaluega Vitoria, ma le mamalu o le aufaigaluega o le Pulega ma le Matagaluega. Sa faapea foi ona molimauina lea aso t'ua e le Toeaina Faatonu o Niusauelese i Sisifo, susuga Simeona Taefu FT, ma le Toeaina ia Tafa'i Galumalemana FT o le Pulega Anoamaa, Apia Sasa'e, faapea le toatele o le aufaigaluega mai itu e fia o le Ekalesia, o le paia o aiga na lua, tainane uo ma paaga a le faifeau ia Satala ma le faletua. Na auai foi le mamalu faalemalo, le afioga i le faipule o Falealili ia Hon. Toelupe Poulumalu Onesemo, tainane le tamā faaleagaga o le faletua, le faafeagaiga a Vaovai le susuga Vaigafa Paleono FS ma sui o le Ekalesia ma le afioaga.

O le Aulotu lenei o Rockbank na faavaeina ia Tesema 2024, a o Fepuari o le tausaga nei na fai ai la latou filifiliga mo se latou faifeau, na tasi ai le faatofalaiga i le susuga Satala Sa'u ma le Faletua ia Sapi la te tausia le lafu mamoe. O le susuga Satala na i'u mai Malua i le tausaga 2014 ona galue lea i le Matagaluega A'oa'oga Kerisiano i le vaega o Musika ma le A'oga Ta Piano. Na maluu si ona faletua muamua ia Rina a o la'ua vaaia le latou Aulotu i Apolima uta. Na toe faaipoipo atu ia Sapi o le afioaga o Vaovai Falealili, ma malaga atu ai i Ausetalia mo sailiga malo, ma lolotu ai i le EFKS Melton. Mulimuli ane na siitia atu ai i la'ua i le EFKS Northgate, lea e valaau atu le Aulotu i Rockbank o lolotu ma tautua ai i le Atua.

Na taualuga le sauniga i le Sakarameta Paia o le Faamanatuga na ta'ita'i e le susuga ia Satala. Ona afe ane lea o le mamalu o le faapotopotoga e tali le valaau fa'aaloalo a le Ekalesia mo le taumafataga ma fa'aaloaloga maualuluga. A e na muamua foi silasila le Ta'ita'i o le Sauniga ma le mamalu na auai, i le IE o le Feagaiga na saunia e le Aulotu i Rockbank, e faamautu ai le feagaiga ua osia e tusa ma le tu a le atunuu pele o Samoa, o loo lagolagosua i taualumaga o galuega a le Ekalesia. Ia faamanuia le Atua i le galuega ua amata, ma ia tumau le viiga ia te Ia, seanoa lona alofa e lē taunuu faamoemoega.

(saunia Faatonu Sulu).

Feiloai Laulau FT & Ofisa Tutotonu

E masani ai pe a mae'a le Fono Tele, ona malolo lea o le Ofisa Tutotonu a le Ekalesia mo le vaiaso e tasi. O le faamoemoe na faia ai e le Ekalesia lenei fuafuaga, ina ia toe faafoisia ai le soifua maloloina, talu le lua vaiaso sa fitaituga ai le susuga Failautusi Aoao ma le afioga i le Teutupe ma le aufaigaluega, i le tautuaina o le Fono Tele. Pe afai e toe amatalia galuega, o se tasi o ulua'i galuega, o le sauniga lotu lea e aloaia ai feau o le isi tausaga faa Fono Tele ua amatalia, aemaise e feiloa'i aloaia ai le Ofisa ma le Laulau fou o le Fono Tele ua tofia ma amataina nei.

O le Aso Lua, 3 Iuni 2025 i le tuana'i o le aso malolo o le Sisiga Fu'a, na faataunuu ai le faamoemoe o le Ofisa Tutotonu, i le sauniga e feiloai aloaia ai ma le afioga Taitaifono, susuga Enefatu Lesa FT, ma le afioga Sui Taitaifono susuga Palemia Reupena Tauiliili FT. O le sauniga foi lea e amata aloaia ai galuega o lenei tausaga faaFono Tele ua amata. O le susuga lava i le Taitaifono Fono Tele ia Enefatu Lesa FT na ta'ita'iina le sauniga, ma na saunoa faafeiloai ai i le aufaigaluega o le Ofisa Tutotonu (Ofisa Failautusi Aoao, Ofisa Teutupe, EFKSTV, Fale Lomitusi Malua Printing & Bookshop, Ofisa A'oa'oga Kerisiano).

O le susuga i le Failautusi Aoao sa molia le faafetai ma le faamalo i le afioga Taitaifono, faapea le

(faaauau itulau 15)

O E UA MALILIU

LEMAUGA FISO
FAAMOTU FISO
14/02/1945 - 02/06/2025

O le Tofa i le Aliimau o Faleupolu, i le afioaga o le Sa'o Faapito ma le Aiga Salevalasi, i la'ua na Aliimau o Faleupolu ma le Faleatua, le Susū o Sitagata ma le Aiga Sa Sitagatā. O le fofoga taumomoli a le afioga i le Sa'o Faapito. A o le Alii Tiakono o le EFKS Lotofaga, sa avea ma Tiakono Toeaina o le Matagaluega Lotofaga Lepa Aleipata i tausaga 2019 – 2024. Na soifua mai o ia i le Aso Lulu, 14 Fepuari 1945 i Lotofaga, a e na valaau lona Alii ma faamanava ana feau i le Aso Gafua, 2 Iuni 2025 a o faataotolia ai i lona aiga i Vaivase; ua atoa ai le 80 tausaga 3 masina ma le 20 aso o lona soifua. O ona tua'ā: o le tamā o Lemauga Faamotu (Lotofaga) ma le tina o Putitoloula Fiso (Matautu, Falealili). Na faaipoipo atu ia Tauilo Sitanilei Fonoti (Vaovai, Falealili). E to'afa le fanau, aofia ai lana taulaga soifua le susuga ia Lole Fiso FS (Faafeagaiga EFKS Invercargill Niu Sila), ma le fanau tausi e to'atolu.

E suafa matai ia Fulimago, a e na tofia i le suafa Lemauga i le 2007 na avea ai ma Sa'o o le aiga Sa Fisō i Lotofaga seia i'u lona soifua. Na taulamua i nisi o galuega tetele a le Ekalesia, e pei o le malumalu fou (a o soifua Iosefa Uilelea FT) & maota fou o le faafeagaiga (Kapeni Matatia FS). Na faauuina i lo la'ua tofi Tiakono a o i ai i Niu Sila i le EFKS Dunedin. O i la'ua na faavaeina le EFKS Timaru, a e le'i taliu mai i Samoa e tausi lona aiga. Na galue ma ta'ita'i i le tele o komiti a le Aulotu Lotofaga; o ia foi o se tamā talenia i le Ta Piano. Sa fai ma Peresetene i le Timaru Samoa Community Trust, Niu Sila; na fai ma sui o le Faleula, o le Ofisa o le Komiti o le Fono Faavae a Lotofaga. O le Lotu a le Aiga ia Tesema 2024 na ia faailoa ai i lona aiga, le lipoti a lana foma'i i Niu Sila, ua maua o ia i le gasegase o le kanesa. Ui i lea sa le'i atuatuvaile ai o ia, a e tuu pea i le Atua e pule o Ia i lona ola, a tusa ma Lona finagalo aulia le 2027, e faailoga ai le 50 tausaga o le Lotu Faamanatu a lona aiga.

Na aveeseina lona tino malia mai le Maota Faasausau o Sefo Pa'u i le Aso Faraile 13 Iuni, ma faia ai lona ulua'i sauniga i le malumalu EFKS Lotofaga. Na ta'ita'i lana faafeagaiga, le susuga Kapeni Matatia FS (o lana ulua'i malia lea), ma faifeau o le nuu o faafeagaiga a Fiamē. Na sosoo ai ma le Sauniga Faaleaiga na ta'ita'i e Faitoaga Tolua FS, ma molimauina ai le soifua ta'ita'i, soifua tautua o le tamā ia Fiso e lana fanau, o ona uso ma tuafafine, o lona aiga ma ana uo. Sa aufaatasi molimau, i se auauna alofa ma lototele, sa saili malo ma le faamaoni mo le manuia o lona aiga, lona nuu ma le itumalo, aemaise lona finau ma le loto tele, mo le Atua ma se manuia o Lana galuega, le Ekalesia ma lana aufaigaluega sa le'i faapito i se ituaiga. Na molimau foi le Toeaina susuga Uosepi Paiaaia FT i le soifua tautua o lenei auauna, a o latou galulue i le EFKS Timaru ma le Matagaluega Niu Sila Saute. Ona mapu atu lea o lona tino i lona aiga mo Leoleoga.

O le Aso Toonai 14 Iuni na faia ai lona Toe Sauniga i le Malumalu EFKS Lotofaga, sa faatautaia e le Pulega Lepa ma Lotofaga. Na ta'ita'i le Susuga i le Toeaina o le Pulega, Faasalafa Alaovae FT (Matatufu), faaulufale le malia e Malo Afia FS (Aufaga), tatalo le susuga Dr. Tavita Maliko FS (Lepa), faitau Tusi Paia ma Lauga le susuga Uaealesi Isaraelu FS (Saleapaga). Na molimau le tina ia Tauilo Fiso i la latou mafutaga mafana ma fiafia ma le tamā - o lana upu ia te ia ma ma le

fanau, e lē sili a'e i latou nai lona aiga. Na molimau le uso ia Mata'utia Pulega fai ma sui o le aiga; o le afioga Tupuola Oloialii Koki na molimau fai ma sui o le afioaga o Fiamē ma Salevalasi (sa tuatuagia le afioga i le Sa'o Faapito i fonotaga faalemalo i atunuu mamao), faapea le susuga Oteta Taulealo FS (faafeagaiga EFKS Timaru); a e taualuga i le molimau o lona soifua faaleagaga, a lana feagaiga le susuga Kapeni Matatia FS. Na ia ta'ua e ui ina pu'upu'u le la'ua mafutaga, a ua na faamaonia le soifua faatuatua faamaoni o lenei auauna i le Atua, e ala i lona soifua faamalosi i tapuaiga faitele, o le faamaoni i ana osiga taulaga i soo se auala, o le faamaopoopoina o lona aiga ma le nuu, na te faasilisili ma faamuamua le Atua i soo se mea mo le viiga o lona suafa. *“Amuia lea auauna, o maua mai e lona Matai o loo faapea ona ia fai. Le auauna lelei e, ma le faamaoni, ulufale mai ia i le fiafia o lou Alii.”* Ona faai'u atu lea o le sauniga i lona oliolisaga tumau i lona aiga, na ta'ita'i e lana faafeagaiga ia Kapeni Matatia FS, ma faamavae atu ai i le Pese Faamavae a le au kerisiano, “Talofa uso e, tofaina oe.” Ia manuia lau malaga tamā; faafetai mo fautuaga, a'oa'oga, ma faata'ita'iga lelei, fai ma viiga o le Atua.

Saunia: Susuga Kapeni Matatia FS
EFKS Lotofaga,
Matagaluega LEPA LOTOFAGA ALEIPATA.

Feiloai Laulau FT & Ofisa Tutotonu

faafeilaoa'i aloaia o susuga i Toeaina e tusa ma lo la tofia e ta'ita'i le Ekalesia i lenei tausaga. Na mae'a saunoaga ma fetalaiga o le aso, ona alo lea i le taumafataga tele na saunia e le afioga Taitaifono ia Lesa. Mulimuli ane, ona fai lea o le fa'aaloalo a lana afioga i le Taitaifono, e ala i le lafoia o le Ofisa Tutotonu i lana aufaigaluega atoa, amata mai i le susuga Failautusi Aoao ma le Teutupe, o Ulu o Matagaluega taitasi, ma le aufaigaluega uma e oo lava i le au 'ave lifi, leoleo po ma sikulaki. O se fa'aaloalo maua e fou i le aufaigaluega, na talia ma le loto faafetai tele.

Sa le'i gata ai i lea, a e na faagaetia foi le afioga i le Sui Taitaifono ia Tauiliili Reupena, ona ia folafola lea o le a faapea foi ona ia sauni mai i le aso e sosoo ai, e soo'ula le agaga o le feiloa'i ma mafuta ma le aufaigaluega a le Ekalesia. Ma sa faapea ona le'i misia i se tasi o le aufaigaluega, lea avanoa taua sa ma'aau ai le afioga i le Sui Taitaifono, i meaalofo tupe mo le ofisa atoa. Ia faamanuia tele le Atua i le maau alofa mo le aufaigaluega, ma ia toe faatutumu e le Atua mea ua faagaogaina. Ia manuia le alofaiva o le Laulau a le Fono, i le ta'ita'iina o le sa o le Ekalesia i lenei tausaga faaFono Tele ua savalia.

(saunia: Faatonu Sulu)

